

經籍典第三百三十四卷

經學部傳經名儒列傳八

宋 傅隆

按宋書傅隆傳隆字伯祚北地靈州人也高祖咸晉司隸校尉曾祖晞司徒屬父祖早亡隆少孤又無近屬單貧有學行不好交游義熙初年四十始爲孟昶建威將軍員外散騎侍郎歷太子率更令廬陵王義真諮議參軍出補山陰令太祖元嘉初除司徒右長史遷御史中丞當官而行甚得司直之體出爲義興太守在郡有能名徵拜左民尙書尋轉太常十四年太祖以新撰禮論付隆使下意隆上表曰臣以下愚不涉師訓孤陋閭閻面牆靡識謬蒙詢逮愧懼流汗原夫禮者三千之本人倫之至道故用之家國君臣以之親用之婚冠少長以之仁愛夫妻以之義順用之鄉人友朋以之三益賓主以之敬讓所謂極乎天播乎地窮高遠測深厚莫尙于禮也其樂之五聲易之八象詩之風雅書之典誥春秋之微婉勸懲無不本乎禮而後立也其源遠流廣其體大而義精非夫叡哲大賢孰能明乎此哉况遭暴秦焚亡百不存一漢興始徵召故老搜集殘文其體例紕繆首尾脫落難可

詳論幸高堂生頗識舊義諸儒各爲章句之說既明不獨達所見不同或師資相傳共枝別幹故聞人二戴俱事后蒼俄已分異盧植鄭元偕學馬融人各名家又後之學者未逮曩時而問難星繁充斥兼兩摛文列錦煥爛可觀然而五服之本或差哀敬之制外雜國典未一於四海家法參駁於縉紳誠宜考詳遠慮以定皇代之盛禮者也伏惟陛下欽明元聖同規唐虞疇咨四岳興言三禮而伯夷未登微臣竊位所以大懼負乘形神交惡者無忘夙夜矣而復猥充博採之數與問爰發之求實無以仰酬聖旨萬分之一不敢廢嚙謹率管穴所見五十二事上呈蚩鄙茫沔伏用竦赧明年致仕拜光祿大夫歸老在家手不釋卷博學多通特精三禮謹于奉公常手抄書籍二十八年卒時年八十三

臧燾

按宋書臧燾傳燾字德仁東莞莒人武敬皇后兄也少好學書三禮貧約自立操行爲鄉里所稱晉孝武帝太元中衛將軍謝安始立國學徐兗二州刺史謝元舉燾爲助教孝武帝追崇庶祖母宣太后議者或謂宜配食中宗燾議曰陽秋之義母以子貴故仲子成風咸稱夫人經云考仲子之宮若

配食惠廟則宮無緣別築前漢孝文孝昭太后並繫子爲號祭於寢園不配於高祖孝武之廟後漢和帝之母曰恭懷皇后安帝祖母曰恭愍皇后雖不繫子爲號亦祭於陵寢不配章安二帝此則二漢雖有太后皇后之異至於並不配食義同陽秋唯光武追廢呂后故以薄后配高祖廟又衛后既廢霍光追尊李夫人爲皇后配孝武廟此非母以子貴之例直以高武二廟無配故耳夫漢立寢於陵自是晉制所異謂宜遠准陽秋考宮之義近摹二漢不配之典尊號既正則罔極之情申別建寢廟則嚴禰之義顯繫子爲稱兼明母貴之所由一舉而允三義固哲王之高致也議者從之頃之去官以母老家貧與弟熹俱棄人事躬耕自業約已養親者十餘載父母喪亡居喪六年以毀瘠著稱服闋除臨沂令義旗建爲太學博士參右將軍何無忌軍事隨府轉鎮南將軍高祖鎮京口與熹書曰頃學尙廢弛後進頽業衡門之內清風輟響良由戎車屢警禮樂中息浮夫近志情與事染豈可不敷崇墳籍敦厲風尙此境人士子姪如林明發搜訪想聞令軌然荆玉含寶要俟開瑩幽蘭懷馨事資扇發獨習寡悟義著周典今經師不遠而赴業無聞非唯志學者鮮或是勸誘未至邪想復弘之參高祖中軍軍事入補尙書度支郎改掌祠部襲封高陵侯時太廟鴟尾災熹謂著作郎徐廣曰

昔孔子在齊聞魯廟災曰必桓僖也今征西京兆四府君宜在毀落而猶列廟饗此其微乎乃上議曰臣聞國之大事在祀與戎將營宮室宗廟爲首古先哲王莫不致肅恭之誠心盡崇嚴乎祖考然後能流淳化於四海通幽感於神明固宜詳廢興於古典循情禮以求中者也禮天子七廟三昭三穆與太祖而七自考廟以至祖考五廟皆月祭之遠廟爲祧有二祧享嘗乃止去祧爲壇去壇爲墀有禱然後祭之此宗廟之次親疎之序也鄭元以爲祧者文王武王之廟王肅以爲五世六世之祖尋去祧之言則祧非文武之廟矣周之祖宗何云去祧爲壇乎明遠廟爲祧者無服之祖也又遠廟則有享嘗之禮去祧則有壇墀之殊明世遠者其義彌疎也若祧是文武之廟宜同月祭於太祖雖推后稷以配天由功德之所始非尊崇之義每有差降也又禮有以多貴者故傳稱德厚者流光德薄者流卑又云自上以下降殺以兩禮也此則尊卑等級之典上下殊異之文而云天子諸侯俱祭五廟何哉又王祭嫡殤下及來孫而上祀之禮不過高祖推隆恩於下流替誠敬於尊屬亦非聖人制禮之意也是以泰始建廟從王氏議以禮父爲士子爲天子諸侯祭以天子諸侯其尸服以士服故上及征西以備六世之數宣皇雖爲太祖尙在子孫之位至於敬祭之日未申東向之禮所謂子

雖齊聖不先父食者矣今京兆以上既遷太祖始得居正議者以昭穆未足欲屈太祖於卑坐臣以爲非禮典之旨所與太祖而七自是昭穆既足太祖在大世之外非爲須滿七廟乃得居太祖也議者又以四府君神主宜永同於殷祫臣又以爲不然傳所謂毀廟之主陳乎太祖謂太祖以下先君之主也故白虎通云禘祫祭遷廟者以其繼君之體持其統而不絕也豈如四府君在太祖之前非繼統之主無靈命之瑞非王業之基昔以世近而及今則情禮已遠而當長饗殷祫永虛太祖之位求之禮籍未見其可昔永和之初大議斯禮于時虞喜范宣並以淵儒碩學咸謂四府君神主無緣永存於百世或欲瘞之兩階或欲藏之石室或欲爲之改築雖所秉小異而大歸是同若宣皇既居羣廟之上而四主禘祫不已則大晉殷祭長無太祖之位矣夫理貴有中不必過厚禮與世遷豈可順而不斷故臣子之情雖篤而靈厲之諡彌彰追遠之懷雖切而遷毀之禮爲用豈不有心於加厚顧禮制不可踰爾石室則藏於廟北改築則未知所處虞主所以依神神移則有瘞埋之禮四主若饗祀宜廢亦神之所不依也准傍事例宜同虞主之瘞埋然經典難詳羣言紛錯非臣卑淺所能折中時學者多從燾議竟未施行遷通直郎高祖鎮軍車騎中軍太尉諮議參軍高祖北伐關洛大司

馬琅邪王同行除大司馬從事中郎總留府事義熙十四年除侍中元熙元年以脚疾去職高祖受命徵拜太常雖外戚貴顯而彌自沖約茅屋蔬食不改其舊所得奉祿與親戚共之永初三年致仕拜光祿大夫加金章紫綬其年卒時年七十少帝追贈左光祿大夫加散騎常侍長子寔護軍司馬宜都太守少子綽太子中舍人新安太守寔長子諶之尚書都官郎烏程令諶之弟凝之學涉有當世才具與司空徐湛之爲異常之交年少時與北地傅僧祐俱以通家子始爲太祖所引見時上與何尚之論鑄錢事凝之便干其語上因回與論之僧祐引凝之衣令止凝之大言謂僧祐曰明主難再遇便應正盡所懷上與往復十餘反凝之詞韻銓序兼有理證上甚賞焉歷隨王誕後軍記室錄事欲以爲青州其事不果遷尚書右丞以徐湛之黨爲元凶所殺子黃尚書主客郎徐羨之征西功曹爲攸之盡節事在攸之傳凝之弟潭之亦有美譽太宗世歷尚書吏部郎御史中丞後廢帝元徽中爲左民尚書卒官潭之弟澄之太子左積弩將軍追贈通直郎綽子煥順帝昇明中爲武昌太守

徐廣

按宋書徐廣傳廣字野民東莞姑幕人也父藻都水使者兄邈太子前衛率家世好學至廣尤精百

家數術無不研覽謝元爲州辟廣從事西曹又譙王司馬恬鎮北參軍晉孝武帝以廣博學除爲祕書郎校書祕閣增置職僚轉員外散騎侍郎領校書如故隆安中尙書令王珣舉爲祠部郎李太后薨廣議服曰太皇太后名位允正體同皇極理制備盡情禮彌申陽秋之義母以子貴旣稱夫人禮服從正故成風顯夫人之號僖公服三年之喪子於父之所生體尊義重且祖不厭孫固宜遂服無屈而緣情立制若嫌明文不存則疑斯從重謂應同於爲祖母後齊衰三年服從其議時會稽王世子元顯錄尙書欲使百僚致敬臺內使廣立議由是內外並執下官禮廣常爲愧恨焉元顯引爲中軍參軍遷領軍長史桓元輔政以爲大將軍文學祭酒義熙初高宗使撰軍服儀注乃除鎮軍諮議參軍領記室封樂成縣五等侯轉員外散騎常侍領著作郎二年尙書奏曰臣聞左史述言右官書事乘志顯於晉鄭陽秋著乎魯史自皇代有造中興晉祀道風帝典煥乎史策而太和以降世歷三朝元風聖迹倏爲疇古臣等參詳宜敕著作郎徐廣撰成國史詔曰先朝至德光被未著方策宜流風緬代永貽將來者也便敕撰集六年遷散騎常侍又領徐州大中正轉正員常侍時有風雹爲災廣獻書高祖曰風雹變未必爲灾古之聖賢輒懼而修己所以興政化而隆德教也嘗忝服事宿眷

未忘思竭塵露率誠于習明公初建義旗匡復宗社神武應運信宿平夷且恭謙儉約虛心匪懈來蘇之化功用若神頃事故既多刑德並用戰功殷積報叙難盡萬機繁湊固應難速且小細煩密羣下多懼又穀帛豐賤而民情不勸禁司互設而劫盜多有誠由俗弊未易整而望深未易炳追思義熙之始如有不同何者好安願逸萬物之大趣習舊駭新凡識所不免要當俯順羣情抑揚隨俗則朝野歡泰具瞻允康矣言無可採願矜其愚款之志又轉大司農領著作郎皆如故十二年晉紀成凡四十六卷表上之遷祕書監初桓元篡位安帝出宮廣陪列悲慟哀動左右及高祖受禪恭帝遜位廣又哀感涕泗交流謝晦見之謂之曰徐公將無小過廣收淚答曰身與君不同君佐命興王逢千載嘉運身世荷晉德實眷戀故主因更歔歔永初元年詔曰祕書監徐廣學優行謹歷位恭肅可中散大夫廣上表曰臣年時衰耄朝散永闕端居都邑徒增替怠臣墳墓在晉陵臣又生長京口戀舊懷遠每增感暮心息道元謬荷朝恩忝宰此邑乞相隨之官歸終桑梓微志獲申殞沒無恨許之贈賜甚厚性好讀書老猶不倦元嘉二年卒時年七十四答禮問百餘條用於今世廣子豁在良吏

裴松之

按宋書裴松之傳松之字世期河東聞喜人也祖昧光祿大夫父珪正員外郎松之年八歲學通論語毛詩博覽墳籍立身簡素晉孝武太元中革選名家以參顧問拜員外散騎侍郎義熙初爲吳興故鄣令在縣有績高祖北伐領司州刺史以松之爲州主簿轉治中歷國子博士太祖元嘉三年分遣大使巡行天下松之使湘州兼散騎常侍班宣詔書曰今使散騎侍郎等申令四方周行郡邑親見刺史二千石官長申述至誠廣詢治要觀察吏政訪求民隱旌舉操行存問所疾禮俗得失一依周典每各爲書還具條奏俾朕昭然若親覽焉松之反使奏曰臣聞天道以下濟光明君德以廣運爲極古先哲后因心溥被是以文思在躬則時雖自洽禮行江漢而美化斯遠故能垂大哉之休詠廓造周之盛則伏惟陛下神叡元通道契曠代冕旒華堂垂心八表咨敬敷之未純虞明揚之靡暢清問下民哀此鰥寡渙焉大號周爰四達遠猷形於雅誥惠訓播乎遐邇是故率土仰詠重譯咸悅臣謬蒙詮任慙懼屏營不知所措奉二十四條謹隨事爲牒伏見詔書禮俗得失一依周典每各爲書還具條奏謹依事爲書以繫之後松之甚得奏使之義論者美之轉中書侍郎司冀二州大中正

上使注陳壽三國志松之鳩集傳記增廣異聞既成奏上上善之曰此爲不朽矣出爲永嘉太守勤恤百姓更民便之十四年領國子博士進太中大夫續何承天國史未及撰述二十八年卒時年八十子嗣南中郎參軍松之所著文論及晉紀嗣注司馬遷史記並行於世

何承天

按宋書何承天傳承天東海鄒人也從祖倫晉右衛將軍承天五歲失父母徐氏廣之姊也聰明博學故承天幼漸訓義儒史百家莫不該覽高祖以爲太尉行參軍除太學博士義熙十六年除著作佐郎撰國史尋轉太子率更令十九年立國子學以本官領國子博士皇太子講孝經承天與中庶子顏延之同爲執經遷御史中丞二十四年遷廷尉未拜上欲以爲吏部已受密旨承宣漏之坐免官卒於家年七十八先是禮論有八百卷承天刪減并合以類相從凡爲三百卷并前傳雜論纂文論並傳於世又攷定元嘉歷語在律曆志

周續之

按宋書隱逸周續之傳續之字道祖鴈門廣武人也其先過江居豫章建昌縣續之年八歲喪母哀

戚過于成人奉兄如事父豫章太守范甯於郡立學招集生徒遠方來者甚衆續之年十二詣甯受業居數年通五經并緯候名冠同門號曰顏子旣而閒居讀老易入廬山事沙門釋慧遠時彭城劉遺民遁迹廬山陶淵明亦不應徵命謂之尋陽三隱徵太學博士不就嘗以嵇康高士傳得出處之美因爲之注高祖之北討世子居守迎續之館於安樂寺延入講禮月餘復還山江州刺史劉柳薦之高祖曰臣聞恢耀和肆必在兼城之寶翼亮崇本宜紆高世之逸是以渭濱佐周聖德廣運商洛匡漢英業乃昌伏惟明公道邁振古應天繼期遊外暢於冥內體遠形於應近雖汾陽之舉輟駕於時艱明揚之旨潛感於穹谷矣竊見處士鴈門周續之清真貞素思學鉤深弱冠獨往心無近事性之所遣榮華與饑寒俱落情之所慕巖澤與琴書共遠加以仁心內發義懷外亮留愛昆卉誠著桃李若升之宰府必鼎味斯和濯纓儒官亦王猷遐緝臧文不知失在降賢言偃得人功由升士願照其款丹不以人廢言俄而辟爲太尉掾不就高祖北伐還鎮彭城遣使迎之禮賜甚厚每稱之曰心無偏吝眞高士也尋復南還高祖踐祚復召之乃盡室俱下上爲開館東郭外招集生徒乘輿降幸并見諸生問續之禮記慤不可長與我九齡射於矍圃三義辨析精奧稱爲該通續之素患風痺不

復堪講乃移病鍾山景平元年卒時年四十七通毛詩六義及禮論公羊傳皆傳於世

雷次宗

按宋書隱逸雷次宗傳次宗字仲倫豫章南昌人也篤志好學元明三禮毛詩隱退不交世務本州辟從事員外散騎侍郎並不就元嘉十五年徵至京師開館於鷄籠山聚徒教授置生百餘人會稽朱膺之潁川庾蔚之並以儒學監總諸生時國子學未立上留心藝術使丹陽尹何尚之立元學太子率更令何承天立史學司徒參軍謝元立文學凡四學並建車駕數幸次宗學館資給甚厚又除給事中不就還廬山公卿以下並設祖道二十三年詔曰前新除給事中雷次宗篤尚希古經行明修守志隱約宜加升引以旌退素可散騎侍郎後又徵詣京邑爲築室於鍾山西巖下謂之招隱館使爲皇太子諸王講喪服經次宗不入公門乃使自華林東門入延賢堂就業二十五年卒於鍾山年六十三太祖與江夏王義恭書道次宗亡義恭答曰雷次宗不救所疾甚可痛念其幽棲窮藪自賓聖朝克己復禮始終若一伏惟天慈弘被亦垂矜愍子肅之頗傳其業官至豫章郡丞

關康之

按宋書隱逸王素傳關康之字伯瑜河東陽人世居京口少而篤學姿狀豐偉下邳群繹以文義見稱康之與之友善特進顏延之見而知之晉陵顧悅之難王弼疑義四十餘條康之申王難顧遠有情理又爲毛詩義經籍疑滯多所論釋太宗泰始初徵爲通直郎辭以疾順帝昇明元年卒

南齊 王儉

按南齊書王儉傳儉字仲寶瑯琊臨沂人也祖曇首宋右光祿父僧綽金紫光祿大夫儉幼有神彩專心篤學手不釋卷丹陽尹袁粲聞其名言之於明帝尙陽羨公主拜駙馬都尉解褐祕書郎太子舍人超遷祕書丞上表求校墳籍依七略撰七志四十卷上表獻之表辭甚典又撰定元徽四部書目母憂服闋爲司徒右長史歷吏部郎昇明二年遷長兼侍中以父終此職固讓儉察太祖雄異先于領府衣裾太祖爲太尉引爲右長史恩禮隆密專見任用轉左長史及太傅之授儉所倡也少有宰相之志物議咸相推許時大典將行儉爲佐命禮儀詔策皆出于儉褚淵唯爲禪詔文使儉參治之齊臺建遷右僕射領吏部建元元年改封南昌縣公食邑二千戶明年轉左僕射領選如故上壞宋明帝紫極殿以材柱起宣陽門儉與褚淵及叔父僧虔連名上表諫上手詔酬納宋世外六門設

竹籬是年初有發曰虎樽者言白門三重門竹籬穿不完上感其言改立都牆儉又諫上答曰吾欲令後世無以加也朝廷初基制度草創儉識舊事問無不答上歎曰詩云維嶽降神生甫及申今亦天爲我生儉也其年儉固請解選見許加侍中固讓復散騎常侍上曲宴羣臣數人各使効伎藝褚淵彈琵琶王僧虔彈琴沈文季歌子夜張敬兒舞王敬則拍張儉曰臣無所解唯知誦書因跪上前誦相如封禪書上笑曰此盛德之事吾何以堪之後上使陸澄誦孝經自仲尼居而起儉曰澄所謂博而寡要臣請誦之乃誦君子之事上章上曰善張子布更覺非奇也上崩遺詔以儉爲侍中尙書左鎮軍將軍永明二年領國子祭酒三年領太子少傅是歲省總明觀于儉宅開學士館悉以四部書充儉家又詔儉以家爲府四年以本官領吏部儉長禮學諳究朝儀每博議證引先儒罕有其例八坐丞郎無能異者令史諮事賓客滿席儉應接銓序傍無留滯十日一還學監試諸生巾卷在庭劍衛令史儀容甚盛作解散髻斜插幘簪朝野慕之相與放効儉嘗謂人曰江左風流宰相唯有謝安蓋自比也世祖深委仗之士流選用奏無不爲五年卽本號開府儀同三司七年改領中書監參掌選事其年疾上親臨視薨年三十八詔贈太尉侍中中書監公如故謚文憲公儉寡嗜慾唯以經

國爲務車服塵素家無遺財手筆典裁爲當時所重撰古今喪服集記并文集並行于世

劉瓛

按南齊書劉瓛傳瓛字子珪沛國相人晉丹陽尹惔六世孫也祖弘之給事中父惠治書御史瓛初州辟祭酒主簿宋大明四年舉秀才兄璉亦有名先應州舉至是別駕東海王元曾與瓛父惠書曰此歲賢子充秀州闔可謂得人除奉朝請不就少篤學博通五經聚徒教授常有數十人太祖踐祚召瓛入華林園談語謂太曰吾應天革命物議以爲何如瓛對曰陛下誠鑒前軌之失加之以寬厚雖危可安若循其覆轍雖安必危矣旣出帝顧謂司徒褚淵曰方直乃爾學士故自過人上欲用瓛爲中書郎使吏部尙書何戢喻旨曰上欲以鳳池相處瓛曰平生無榮進意後以母老闕養拜彭城郡丞武陵王暘爲會稽太守上欲令瓛爲暘講除會稽郡丞學徒從之者轉衆瓛姿狀纖小儒學冠於當時京師士子貴遊莫不下席受業性謙率通美不以高名自居遊詣故人唯一門生持胡牀隨後主人未通便坐問答居在檀橋瓦屋數間上皆穿漏學徒敬慕不敢指斥呼爲青溪焉竟陵王子良表世祖爲瓛立館以揚烈橋故主第給之未及徙居病卒門人受學並弔服臨送時年五十六梁

天監元年爲璣立碑諡曰貞簡先生所著文集皆是禮義行於世初璣講月令畢謂學生嚴植曰江左以來陰陽律數之學廢矣吾今講此曾不得其髣髴時濟陽蔡仲熊禮學博聞謂人曰凡鍾律在南不容復得調平昔五音金石本在中土今旣南來土氣偏陂音律乖爽璣以爲然

陸澄

按南齊書陸澄傳澄字彥淵吳郡吳人也祖邵臨海太守父瑗州從事澄少好學博覽無所不知行止坐眠手不釋卷起家太學博士宋泰始初爲尚書殿中郎轉通直郎兼中書郎尋轉兼左丞泰始六年詔皇太子朝賀服衰冕九章澄與儀曹郎丘仲起議服冕以朝實著經文奏除六冕漢明還備魏晉以來不欲令臣下服衰冕故位公者加侍官今皇太子禮絕羣后宜遵聖王盛典革近代之制尋轉著作正員郎兼官如故永明元年轉度支尚書尋領國子博士時國學置鄭王易杜服春秋何氏公羊糜氏穀梁鄭元孝經澄謂尚書今王儉曰孝經小學之類不宜列在帝典乃與儉書曰易近取諸身遠取諸物彌天地之道通萬物之情自商瞿至田何其間五傳年未爲遠無訛雜之失秦所不焚無崩壞之弊雖有異家之學同以象數爲宗數百年後乃有王弼王濟云弼所悟者多何必能